

國初群雄事略

圖  
說  
解  
讀  
書

國初羣雄事略卷七

虞山錢謙益牧齋甫編

周張士誠

士誠泰州白駒場人至正十四年正月僭稱誠王國號  
大周改元天祐十七年降於元授太尉二十四年自稱  
吳王二十七年九月被執自縊死年四十又七國亡

至正十三年癸巳

五月乙未泰州白駒場亭民張士誠及其弟士德士信爲亂  
陷泰州及興化縣遂陷高郵據之僭國號大周自稱誠王建

元天祐

元史順帝紀

按實錄士誠以癸巳正月起事此云五月者紀其陷高郵

之月也實錄士誠建國改元在甲午正月此則先事而書之耳

士誠小字九四泰之白駒場亭民以操舟運鹽爲業少有  
膂力無賴販鹽諸富家富家多凌侮之或弗酬其直弓兵  
立義者屢窘辱之士誠不勝憤癸巳正月遂與其弟士義  
士德士信結壯士李伯昇等十八人殺立義并所讎富家  
焚其廬舍延燒民居甚眾自度不可已乃入旁近場招集  
少年謀起兵行至丁谿大姓劉子仁集眾拒之士義中矢  
死士誠益憤怒欲滅子仁子仁眾潰入海士誠遂乘勝攻  
泰州有眾萬餘克興化結寨於德勝湖四月元以萬戶告  
粵招之士誠不受命五月攻破高郵入據之實錄張士誠本傳

張士誠淮南泰州白駒場人泰州地濱海海上鹽場三十  
有六隸兩淮運鹽使司士誠與弟士義士德士信並駕運  
鹽納船兼業私販初無異志至正十一年天下兵起朱定  
一陳贊五汪宗五作亂江陰泰州人王克柔者家富好施  
多結游俠將爲不軌高郵知府李齊收捕於獄李華甫與  
麪張四素感克柔恩謀聚眾劫獄齊以克柔解發揚州後  
招安華甫爲泰州判囚爲干夫長十三年士誠又與華甫  
同謀起事未幾士誠黨與十有八人共殺華甫遂併其眾  
焚掠村落驅民爲盜陷通泰高郵自稱誠王改元天祐設  
官分職把截要衝南北梗塞立淮南行中書省於揚州以  
扼其勢旣而亦招安之立義兵元帥府以官其黨然狙詐

百出卒不就降 輒耕錄

國朝卷之二

先是中原上馬賊剽掠淮汴閒朝廷不能制張九四爲鹽場綱司牙儈以公鹽夾帶私鹽並緣爲姦利資性輕財好施甚得人心當時鹽丁苦於官役遂推其爲主作亂草木

十三年張士誠爲亂破泰州河南行省遣高郵知府李齊

往招降被拘久之賊酋自相殺始縱齊來歸泰州平賊徒

尙蠶聚士誠鼓變殺參知政事趙璉掠官庫民財走入德

勝湖俄陷興化縣行省以左丞偰哲篤偕宗王鎮高郵使

齊出守甓社湖夏五月乙未數賊入城一譟呼官省憲官

皆遁齊急還救城賊已閉門拒我遂連興化接德勝湖舟

艦四塞蔓延入寶應縣已而有詔凡叛逆者斬之詔至高

郵不得入賊給曰請李知府來乃受命行省強齊往至則  
下齊獄中士誠本無降意特遷延爲繕飾計耳官軍謀知  
之乃進攻城士誠呼齊使跪齊叱曰吾膝如鐵豈肯爲賊  
屈士誠怒扼之跪齊立而詬之乃拽倒槌碎其膝而剗之

元史忠義傳

河南兵起兩淮騷動乃析河南地立淮南江北行省於揚  
州以璉參知政事會張士誠爲亂突起海濱陷泰州興化  
行省遣兵討之不克乃命高郵知府李齊往招諭之士誠  
因請降行省授以民職且乞從征討以自效遂移璉鎮泰  
州璉乃趣士誠治划船趨濠泗士誠疑憚不肯發又覘知  
璉無備遂復反夜四鼓縱火登城璉力疾擣佩刀上罵與

賊圍市衢賊圍璉邀至其船璉馳騎奮擊賊以槊撞璉墮地欲昇登其舟璉瞋目大罵遂死之

詞上

泰州李二起行省移納速刺丁捍高郵德勝湖焚賊船

十餘柁李二失援遂降其黨張士誠殺李二復爲亂

政趙璉入據興化而水陸襲高郵屯兵東門納速刺丁以

舟師會諸軍討之距三塚鎮發火箭火鏃射之死者蔽流

而下賊繩船於背盡力來攻而阿速衛軍及真滁萬戶府

等官皆遁走納速刺丁與其三子皆死之

詞上

詔使往高郵不得達而還謬稱賊已迎拜但乞名爵耳行

省不虞其欺遺本省照磨盛昭入高郵授所與士誠官士

誠拒不聽拘諸舟中旣而官軍逼高郵士誠授昭以兵使

出拒官軍昭叱之大罵不絕口城怒先剝其臂肉而後磔  
之

同上

泰州鹽綱張士誠兄弟據高郵泰州及三十六鹽場俞本  
記事

錄

癸巳正月張士誠起自泰州劉子仁兵潰其勢始振從者萬餘人三月攻陷泰州淮南行省告變元以萬戶告身招之不受五月復陷泰州及興化縣遂據高郵

平吳錄

按癸巳正月士誠起事旣陷泰州行省遣兵討之不克乃遣高郵知府李齊諭降而復叛再陷泰州殺趙璉遂破興化據高郵殺李齊及盛昭平宋錄於藍洞書號以萬戶告身招之不聽又於五月書行誥再遣李齊諭之來聽則

以一事爲二事矣又盛昭之死當在泰和之歲元祐繼

傳甚明平吳錄相傳出於吳文定公雜錄元祐實錄而歲  
月先後錯互不一今悉正之

六月命前河西廉訪副使也先不花爲淮西添設宣慰副使  
討泰州詔淮南行省平章政事福壽討興化

元史

至正十四年

甲午

周天祐元年

甲午春正月甲子朔張士誠國號大周自稱誠王改元天祐

實錄

平吳錄同

二月以湖廣行省平章政事苟兒爲淮南行省平章政事以  
兵攻高郵

元史

石普者徐州人也以樞密院都事從樞密院官守淮安時

張士誠據高郵普詣丞相脫脫面陳破敵之策且曰高郵負重湖之險騎兵卒莫能前與普步兵三萬保取之高郵旣平則濠泗易破丞相壯之命權山東義兵萬戶府事招義民萬人以行汝中柏陰沮之減其軍半又使聽淮南行省節制普行次范水砦日未夕令軍日具食夜漏三刻銜枚趨寶應其營中更鼓如平時抵縣卽登城樹幟賊大驚潰乘勝拔十餘砦將抵高郵分兵三道普自將攻北門賊敗遁入城普先士卒躡之縱火焚關門賊懼謀棄城走而援軍望之接不進且忌普成功總兵者遣蒙古軍千騎突厥普軍前欲收先入之功而賊以死捍蒙古軍卽馳回普止之不可遂爲賊所蹂踐率墜水中普軍亂勒餘兵血戰

良久仗劍大呼直入賊陳中從者僅三十人日西援絕墮  
馬步戰頭目左脅爲鎗所中猶手握其鎗斫賊與從者皆  
力戰死之

元史忠義傳

六月辛卯朔張士誠寇揚州丙申達識帖睦邇以兵討張士  
誠敗績諸軍皆潰詔江浙行省參知政事佛家閻會達識帖  
睦邇復進兵討之

元史

元史於此下記己酉盱眙縣陷庚戌陷泗州官軍潰平吳  
錄諸書皆牽連書之不知士誠兵力僅能出沒高郵揚州  
旋爲脫脫圍困僅而得免豈能遽及盱泗者蓋濠泗之兵  
非高郵也當時高郵濠泗兵勢頗相因依故石晉告脫脫  
曰高郵旣平則濠泗易破脫脫旣圍高郵卽分兵西平六

合蓋爲此也詳在龍鳳事略中

九月辛酉詔脫脫以太師中書右丞相總制諸王各愛馬諸省名翼軍馬董督總兵領兵大小官出征高郵十一月丁卯脫脫領大兵至高郵辛未戰於高郵城外大敗賊眾乙酉遺兵平六合縣十二月丁酉詔以脫脫老師費財已逾三月坐視寇盜恬不爲意削脫脫官爵安置淮安路元史

張士誠據高郵屢招諭之不降詔脫脫總制諸王諸省軍討之黜陟予奪一切庶政悉聽便宜行事省臺院部諸司聽選官屬從行稟受節制西域西番皆發兵來助旌旗累千里金鼓震野出師之盛未有過之者十一月至高郵辛未至乙酉連戰皆捷分遣兵平六合賊勢大蹙俄有詔罪

其老師費財以河南行省左丞相太不花中書平章政事  
月濶察兒知樞密院事雪雪代將其兵削其官爵安置淮  
安

元史脫脫傳

元貶脫脫詔畧曰答刺罕太師中書右丞相脫脫往年征  
徐土僅復一城不日而旋失茲者薦總大兵再期埽蕩  
老師費財已逾三月徒懷眷戀之思曾無尺寸之效坐視  
寇玩日減精銳虛費國家之錢糧誘朝廷之名爵皇子  
愛猷識里答刺俯從大宥可削去兵柄安置淮安路弟御  
史大夫也先帖木兒安置寧夏路脫脫有意外旅拒等事  
各以大義效忠從事宣讀畢脫脫匹馬北歸將士潰亂元  
兵不復振矣

俞本記事錄

十二月辛亥詔至軍中參議龔伯遂曰丞相出師時嘗被密旨今奉密旨一意進討可也詔書且勿開開則大事去矣脫脫弗從同上

脫脫總天下兵圍高郵日事攻擊矢石雨注城中幾不支日議降附又恐罪在不赦圍者亦指日成功忽有詔旨來卸軍軍中聞之皆大哭當詔未開讀時龔伯遂勸奉密旨詔書且勿聽脫脫搖首曰不可遂受詔大軍百萬一時四散先是諸大臣子弟從行者哈麻歷告其家陰遣人來軍中曰詔書且至不卽散者當族誅故散之之遽如此其散而無所之者多從紅軍如鐵甲一軍入襄陽號鐵甲兵者是也是時高郵危困已甚脫脫分兵定真州平六合將攻

國朝卷之三  
濠徐遠近凜然國勢漸張而哈麻歷奸邪誤國遂至危亡  
不救可勝惜哉

庚申外史

脫脫師號百萬聲勢甚盛及抵城下毛胡蘆軍已有登其  
城者忌功者曰不得總兵官命如何輒自先登乃召還及  
再攻之不下未幾下詔貶脫脫師遂潰叛

草木子

詔未下時部將董搏霄對脫脫言天兵南下勢如破竹今  
老師費財何面目歸報天子不若先攻其易脫脫從其言  
分兵攻天長六合賊皆潰敗所殺者悉良民及攻高郵墮  
其外城城中震恐自分亡在旦夕忽聞詔解其權勇氣百  
倍出城拒敵諸衛鐵甲軍抱不平者盡皆散去或相聚山  
林爲盜高郵不可得而復矣

輟耕錄

脫脫兵攻高郵未下元主以讒解其兵柄士誠乘隙出兵  
奮擊元兵大敗實錄本傳

士誠乘閒與李伯昇等十八人潰圍突出走海上其下稍  
稍赴之月山叢談

實錄潘原明本傳云士誠與李伯昇潘元明呂珍等十八  
人突圍北走按脫脫解兵之日開門縱擊元兵已星散矣  
何爲又出走海上哉

是年五月攻破揚州路士義被獲伏誅既而退還高郵九  
月二十五日又攻破揚州適湖廣行省右丞阿魯恢引苗  
軍來十月初一日復退輶耕錄

至正十五年乙未天祐二年